

EKALESIA FAAPOTOPOTOGA KERISIANO I AMERIKA SAMOA
OFISA O A'OA'OGA KERISIANO



VASEGA MATUTUA FAAPITOA



AUKUSO - TESEMA

2021

FA'ASOLOGA MATĀUPU

MANATU TA'ITA'I O AUKUSO:

"O TAGATA NA SAVALI I LE POULIULI" (THE PEOPLE WHO WALKED IN DARKNESS)

1	AUKUSO 08, 2021	O FOLIGA TAUF'AASESE (Deceptive Appearance)
2.	AUKUSO 15, 2021	MATA'U MA FA'ATUATUA (Fear and Faith)
3.	AUKUSO 22, 2021	FA'AMANUIA I MATOU LE ALII E MA AU MEALOFA (Bless us o Lord, and these thy gifts)
4.	AUKUSO 29, 2021	SUEGA 1 MO LE MASINA O AUKUSO

MANATU TA'ITA'I O SETEMA:

"AMATAGA O SE LA'ASAGA FOU" (A NEW PHASE BEGINS)

5	SETEMA 05, 2021	FA'AMATALAINA O TALA (STORYTELLING)
6.	SETEMA 12, 2021	E LE ONA O I MATOU, A IA IA TE OE LE ALII E! (Not Because of Us, but unto you Lord!)
7.	SETEMA 19, 2021	ESESE LE AUFALUEGA, AE TASI LE FEAU (Different Carriers, Same Message)
8.	SETEMA 26, 2021	SUEGA 2 MO LE MASINA O SETEMA

MALOLOGA MA TAPENAGA MO LE LOTU TAMAITI: OKETOPA 3-31, 2021

MANATU TA'ITA'I O NOVEMA:

"OU TE TULAI ATU NEI (HERE I STAND)

*FA'AMANATUINA LE 504 TAUSAGA MATINI LUTERU (MARTIN LUTHER'S
504 ANNIVERSARY)*

9.	NOVEMA 07, 2021	IA I'U INA IA MANUMALŌ LE ALOFA TUNOA (THAT GRACE MIGHT REIGN)
10.	NOVEMA 14, 2021	FA'ATULAGAGA O LE LALOLAGI FOU (THE NEW WORLD ORDER)
11.	NOVEMA 21, 2021	O MEA E AO ONA FAIA E LE TAGATA KERISIANO (WHAT CHRISTIANS SHOULD DO)
12	NOVEMA 28 2021	SUEGA 3 MO LE MASINA O NOVEMA

MANATU TA'ITA'I O TESEMA

"FEAGAIGA MA FOLAFOLAGA" (COVENANTS AND PROMISES)

13	TESEMA 05, 2021	O LE TATALO A HANA (HANNAH'S PRAYER)
14	TESEMA 12, 2021	SUEGA FA'AI'U O LE TAUSAGA

AUKUSO 08, 2021

MATAUPU 1: "O FOLIGA TAUF'AASESE." (DECEPTIVE APPEARANCE.)

TUSI FAITAU: ISAIA 11: 1-10

SINI: A mae'a lenei mataupu, ua malamalama le fanau, ua na'o le Atua e na te mafaia ona suia uiga masani o le gasologa o mea i lona mana silisiliese.

FESOASOANI MO FAIAOGA:

I le suafa manumalo o Iesu Keriso e fa'atalofa atu ai iā outou susuga i faiaoga i le Aso Sa muamua lenei o le tatou aoga talu mai le malologa sa feagai ai. E talitonu le agaga sa maua se fa'asiliga malosi i le alofa ma le agalelei o le Atua a'o feagai ai ma le malologa. I lenei taeao fou, e lelei pe a amata i se tatalo e fa'afeiloa'i ai le fanau. E lelei fo'i pe a fai ni nai fesili e te silafia ai po'o fea sa aga'i iai la latou malologa. E manaia fo'i ae fesili i le fanau pe iai se tasi e malamalama i le uiga o le ulu tala i lenei taeao. A mae'a le mataupu saili se pese e talafeagai ma le mataupu pe fa'aaoga fo'i le pese o le a tu'uina atu. Ia manuia le amataga o le aoga i lenei tausaga.

FESOASOANI MO LE MATAUPU:

Ua tatou masani i le fa'amatalaina o lenei tusi o Isaia. A talanoa iā Isaia, o le taimi tonu lea o le tafeaga a Isaraelu i Papelonia pe tusa ma le 700 T.L.M. O le vaitau na lagona ai le oi i le nu'u o le Atua ona o le fa'asalaga na feagai ma i latou i Papelonia. O le ala lea o le tula'i mai o Isaia se i momoli le fe'au fa'amafanafana i le nu'u o le Atua o lo'o nofo pologa i Papelonia. Ina ne'i fesili pe aisea ua fa'apologa ai Isaraelu i Papelonia. O le tali masani lava e pei fo'i ona iai i le amataga mai o le la osigā feagaiga ma le Atua. Na mafua ona fa'apologa ona ua tele le agasala. E mafai fo'i ona tatou fa'apea, o le fuafuaga lea ua faia e le Atua se'i a'oa'i ai lona nu'u auā e le mafai ona ia tu'u sa'oloto lona nu'u e ola pea i se olaga sesē. O se tala pu'upu'u lenā i le tuāfale (historical background) o le tusi o Isaia. O le tusi faitau la i lenei taeao, o lo'o fa'aulutalaina "o le valoaga i le Mesia ma lona malo." O feagaiga tuai lava ia o lo'o tumu i valoaga mo se Mesia e na te fa'aola le lalolagi agasala. Sa leiloa e Perofeta po'o ai na te fa'ataunu'uina ia valoaga. Ua fanau mai Iesu ma fa'atino lana galuega fa'aola i le lalolagi, ma ua manino mai ai o ia lava lea o le Mesia na valoia ma taunu'u ai valoaga.

O lo'o amata le tusi faitau i le fa'amatalaina o le pogai ma le tupuaga o Iesu Keriso le Mesia. O le fuaiupu e lua e o'o atu i le lima, o lo'o fa'amatala manino ai amioga ma uiga lelei uma e atagia i lea Mesia. A tatou faitau ma mafaufau iai, e mafai ona tatou fa'apea, E mafai ona tatou fa'apea, o lea Mesia ua atoatoa i ai le alofa ma le amiotuni o le Atua. O le fuaiupu e ono e o'o i le sefulu, o lo'o fa'amatala mai ai ni mea e le masani ona tutupu i le gasologa o le ola ma le natura o mea i aso fai so'o. Faimai le valoaga "**E nofo fa'atasi le luko ma le tama'i mamoe, e taoto fo'i le nameri fa'atasi ma le tama'i 'oti, e fa'atasi fo'i le tama'i povi ma le leona ta'anoa, atoa ma le manu peti, e ta'ita'iina fo'i i latou e le tamaititi (f-6).**" E fa'apena fo'i le fuaiupu e fitu e o'o atu i le sefulu. O le fa'amatalaina o mea ofoofogia e tatou te lē mafaufauina e tutupu. Pe a toe fa'amatalaina nei fuaiupu, e foliga mai o manu ma o latou fili tumau ua mafai ona feiloa'i ma nonofo fa'atasi. O le uiga lea o le ulutala "Foliga Tauf'aasese)" O foliga o mea sa tatou mafaufau e le mafai ona toe suia, a'o lea ua fai mai Isaia e mafai ona suia. A tatou toe mafaufau lelei iai, e mafai fa'apefea e se tama'i povi ona nonofo fa'atasi ma se Leona ta'anoa? E le o manu uma ea ua fai ma o latou fili le Leona? A'o lea ua faimai Isaia e mafai ona suia.

Ua tatou iloa nei e le tumau foliga masani o mea o lenei lalolagi. O mea fo'i sa tatou mafaufau e le mafai ona toe suia, o lea ua fai mai Isaia, e mafai lava ona suia. A'o le fesili, e mafai fa'apefea ona toe suia ia mea? O lea ua a'oa'o mai le mataupu i lenei taeao, e na'o le Atua e na te mafaia ona suia mea uma e manatu le tagata e le mafai ona toe suia. E iai fa'afitauli ma mea faigata o lenei olaga ua tatou manatu e le mafai ona toe suia, o mea ia e mafai ona tatou fa'apea o foliga taufa'asesē. O le mea sili ma fa'afetai o lea ua a'oa'o mai le mataupu i lenei taeao, e mafaia e le Atua i lana pule ma lona mana ona suia mea uma e finagalo iai. Ia aua ne'i faia fa'afitauli ma mea faigata o lenei olaga e

fai ma foliga taufa'asese e fa'avaivaia ai lo tatou ola taumafai i mea ua tu'uina mai e le Ali'i mo i tatou. E leai se mea e le mafai ona tatou faia, aua o le Atua o lo'o tatou talitonu ma tapua'i iai e na te mafaia ona suia foliga taufa'asese o le lalolagi ma ana faiga.

A'O'A'OGA

1. Ua na o le Atua lava e na te mafaia i lona mana ona suia le gasologa masani o mea o le soifuaga.
2. Aua ne'i e se'etia i mea taufa'asese o lenei olaga
3. O le fa'atuatua ma tumau i le Atua e ta'itaina ai i tatou i mea tonu e ao ona fai.

GALUEGA FA'ATINO

Silasila i igoa o manu eseese o lo'o tusia i lalo. Ia tusi se laina e fa'ailoa ai le manu ma lona fili e pei ona ta'ua i le tusi o Isaia.

- | | |
|------------------|--------------|
| 1. Luko | Tama'i 'oti |
| 2. Nameri | Povi Fafine |
| 3. Leona Ta'anoa | Tama'i Mamoe |
| 4. Urosa | Tama'i Povi |

UPU MA O LATOU UIGA

Pogai- O le mafuaaga po'o le amataga
Nameri(leopard) - Manu feai e pei o se leona
Urosa (Bear) - Pea

PESE 5 (Tusi Pese)

Ia tu'uina atu le tusi faitau mo le Aso Sa o lumana'i e sailiili ai le fanau.

IA MANUIA TELE TAPENAGA O LENEI ASO SA!

MANATU TA'ITA'I O AUKUSO : "O TAGATA NA SAVAVALI I LE POULIULI" (THE PEOPLE WHO WALKED IN DARKNESS)

AUKUSO 15, 2021

MATAUPU 2: "MATA'U MA FA'ATUATUA" (FEAR AND FAITH)

TUSI FAITAU: ISAIA 14:1-20

SINI: A mae'a lenei mataupu, ia iloa ma malamalama le fanau, e tatau i le lalolagi uma ona matata'u ma fa'atuatua i le Atua .

FESOASOANI MO FAIAOGA:

Fa'atalofa atu i lenei taeao i a outou susuga i Faiaoga. Ou te manatu i lenei taeao ae le'i amataina le mataupu, e

lelei fo'i ae fai ni nai fesili e fa'amanatu ai mataupu i le vaiaso ua te'a. A mae'a lea, ona fesili lea i lau vasega po'o ai e malamalama i le uiga o upu nei e lua, o le 'Mata'u ma le Fa'atuatua.' E fautuaina pea le faitau o le Tusi Paia i Aso Sa uma ina ia malamalama ai le mataupu, ma fa'aleleia atili ai le latou faitau i le Tusi Paia. Saili se pese e talafeagai ma le mataupu. E lelei fo'i pe a tu'u le avanoa i le fanau mulimuli ane, pe iai se pese e latou te silafia e talafeagai ma le mataupu.

FESOASOANI MO LE MATAUPU:

O lo'o tatou iai pea i le tusi o Isaia e pei ona tatou faaaogaina fo'i i le Aso Sa ua te'a. E ui ina eeseese mataupu, ae tasi lava le faatomuaga po'o le faamatalaina o le talaaga o le tusi e pei ona aumaia le mataupu o le vaiaso ua mavae. E lelei fo'i ae toe fo'i iai e faitau atonu e fesoasoani i le faamatalaina o le mataupu o le nei taeao. O le mea taua e tatau ona tatou manatua, o le vaiata o Isaia o le taimi tonu lea o le faatafeaina o Isaraelu i Papelonia ona o le tele o le agasala. I le amataga o le mataupu o le nei taeao, e foliga mai lo'o taumafai Isaia e toe faatepa Isaraelu i le alofa o le Atua na amata mai ai le latou osiga feagaiga ma afua ai le manuia i le lalolagi. O lo'o ta'ua le igoa o Iakopo i ulua'i fuaiupu. O le taua o lea mea, o lo'o faamanatu mai ai faamanuiaga a le Atua i o latou auga tama sa latou mafuta i le amataga. O le fuaiupu muamua e o'o i le tolu, e foliga mai o lea lava o lo'o taumafai Isaia e faamanatu atu ia Isaraelu le faaolataga lea e auala atu ia i latou lona nu'u filifilia. O le feau o lo'o lu'iina ai pea Isaraelu ma faamanatu atu pea lo latou taua tele i le finagalo o lo latou Atua. O le fe'au lava lea e tasi, o lo'o fa'ailoa atu ai e Isaia ia Isaraelu le silisiliese ma le maman o le Atua lea latou te tapua'i i ai. Afai o lea le ituaiga Atua lea e tapua'i iai Isaraelu, o lona uiga e tatau i tagata ona matata'u ma faatuatua ia te ia. O le aano le na o le feau o lo'o affi mai i ulua'i fuaiupu e tolu. O le Atua alofa mai, o lona uiga e tatau i le tagata ona mata'u ma faatuatua ia te ia i aso uma o le ola. Ia tali atu le tagata i le alofa ma le faamaoni e tusa ma lona alofa mai.

I le va'ava'ai atu i le fuaiupu e fa e o'o atu i le luasefulu, o lo'o manino lava le faamatalaina e Isaia le mea e faia e le Atua i le nu'u, o le malo, faapea fo'i le tagata e anaana i le Atua ma faia pea le agasala. E faasalaina e le Atua lea tagata, ae laveaiina pea le tagata lelei. O lona uiga o le feau o lo'o fia avatu e Isaia mo le nu'u, e tatau i tagata uma o le lalolagi ona matata'u ma faatuatua i le Atua e to'atasi i le lagi. I lana pule faito'atasi e mafai ai ona ia faia nei mea uma ua ia fetalai i ai, ma e leai fo'i se tagata e au iai sona malosi ua na o le Atua lava. O lea fo'i le feau e fia avatu mo le nu'u o le Atua o lo'o iai i le tafeaga i Papelonia i le vaiata o Isaia. I totonu o tiga o le nofopologa, e mafai e le Atua ona ia lavea'i ona tagata i lana pule faito'atasi. E le mafai e le lalolagi ona taofia le Atua pe o'o i ona ituaso e aapa atu ai me lavea'i lana fanau faatuatua ia te ia ma le faamaoni. O le mea lea e le tatau ai ona sili a'e ai tiga o le ola pologa i Papelonia, nai lo'o le alofa o le Atua i aso uma. O se a'oa'oga lelei fo'i lea mo i tatou. Ia tatou ola matata'u ma fa'atutua i le Atua i aso uma o le ola. Ia aua ne'i ave le o'o mai o puapuaga e galo ai le Atua, aua e tali mai lava o ia i ona taimi ma fesoasoani i ona tagata. E iloa faapefea ua tatou matata'u ma faatuatua i le Atua? E iloa pe afai tatou faia mea lelei uma e finagalo iai o ia. Ia fesoasoani le Agaga o le Atua e faamalamalama la tatou mataupu i le nei taeao. Ia manuia le Aso Sa.

A'OA'OGA:

1. O le ola mata'u ma fa'atuatua i le Atua e fa'amanuia ina ai.
2. E le i'u lelei le tagata fouvale i le Atua.
3. Ia fai i tatou ma fa'ata'itaiga o e matata'u ma fa'atuatua i le Atua.

UPU MA O LATOU UIGA:

1. Atuatuvale- Lē mautinoa, popole, lē to'a
2. Fa'ato'ilaloina- Fa'apalaai, Fa'aleaga,
3. Fa'agateteina- Fa'afefe, Fa'apopole
4. Fa'atafunaina- Fa'aleaga, Talepe, Fa'alēaoga

PESE: 258 (Tusi Pese)

Ia tu'uina atu le tusi faitau mo le Aso Sa o lumana'i e sailiili ai le fanau.

IA MANUIA TELE TAPENAGA O LENEI ASO SA!

MANATU TA'ITA'I O AUKUSO : "O TAGATA NA SAVAVALI I LE POULIULI" (THE PEOPLE WHO WALKED IN DARKNESS)

AUKUSO 22, 2021

MATAUPU 3: "FA'AMANUIA I MATOU LE ALI'I E, MA AU MEAALOFA"(BLESS US, OH LORD AN THESE THY GIFTS)

TUSI FAITAU: **ISAIA 26:12-21**

SINI: **Ia mae'a lenei mataupu ua iloa ma malamalama le fanau, e le mavae fa'amanuiaga a le Atua mo i tatou.**

FESOASOANI MO FAIAOGA:

Fa'atalofa atu i lenei taeao i a outou susuga i Faiaoga. Ou te manatu i lenei taeao ae le'i amataina le mataupu, e lelei fo'i ae fai ni nai fesili e fa'amanatu ai mataupu i le vaiaso ua te'a. A mae'a lea, ona fa'agasolo lea o le mataupu o lenei taeao. E fautuaina le faia o ni fesili e tulutuliloa ai po'o manatua e le fanau le vaiaso o le perofeta o Isaia faatsi ai ma ni mea na tutupu ai. E mafua se lagona ona o lea ua tolu Aso Sa o faaaogaina pea e tusi lava lea e tasi. O lona uiga ua tatau ona tauloto e le fanau le vaiaso o Isaia ma mea na tutupu ai. Saili se pese e talafeagai ma le mataupu. Mo le vasega matutua fa'apitoa, e fautuaina pea le faaoga o le Tusi Pese. E lelei fo'i pe a tu'u le avanoa i le fanau, pe iai se pese e latou te silafia ma talafeagai ma le mataupu pe a ua leai se pese o le tusi pese.

FESOASOANI MO LE MATAUPU:

Ua tuana'i atu le lua vaiaso o tatou iai pea i le tusi o Isaia e o'o mai lava i le nei taeao. Sa mafuli lava se fa'amatalaga i le faamatalaina o le nu'u o le Atua sa fa'atafeaina ma fa'apologaina i Papelonía i le vaiaso o Isaia. O le mau a nisi o le au popoto o le feagaiga tuai, atonu e le o tagata uma sa iai i le tafeaga sa faavaivai po ua aga'i ina leai se faamoemoe. E pei lava fo'i o mea masani o le olaga nei, o a mea e tutupu e le tutusa uma lava lagona faaalua o tagata e faatatau iai. Pe a toe toso le manatu i le vaiaso o Isaia, sa iai lava nai tagata sa mau pea le faatuatua i le Atua e ui lava i le saofa'i ai i le loloto o tiga o le tafeaga. E pei o tagata faapea o lo'o faatatau iai le tusi faitau o le nei taeao. O tagata e mau pea lo latou faatuatua tusa lava po'o a mea faigata e o'o mai i le olaga nei. O le tusi faitau o le nei taeao e foliga mai o se pese a se tagata ua tumu i le malie. E pei o ni lagona e faailoa ai le faatuatua e fatu mai i le loloto o mafatiaga. Fai mai le ulutala o le tusi faitau "***O le viiga i le Atua, ia faatuatua ia te ia e tatau ai.***" O le fesili tele e tula'i mai i le mafaufau, e faapefea ona vivi'i i le Atua a o lea o lo'o tigaina i le nofopologa i le tafeaga? E tupu faapefea se mea faapea i le nei olaga? E foliga mai i le tusi faitau i le nei taeao, e mafai ona tupu lagona faapea pe afai e talitonu i le Atua ma le loto atoa tusa lava po'o a mea faigata e o'o mai i le ola. Afai e malamalama le tagata i le Atua lea e tapua'i iai, ona ia te ia lea o le ola vivi'i e le aunoa. O le faamoemoe atoa le na o le fuaiupu muamua e o'o atu i le sefulutasi. O ia fuaiupu o lo'o faamatala ai e le perofeta le tatau i le tagata soifua ona viia le Atua e le aunoa.

I le fuaiupu e sefululua e o'o atu i le luasefulutasi, o lo'o amata i le olega a le tagata i le Atua ina ia faamanuia mai pea. E le ona o se mana'o tele, ae o le agaga maualuga e faalagolago pea i le Atua e na te faasoa mai le manuia. O lagona o le faatauva'a ua o'o ifo i le tagata o le Atua. O le tagata e le o faamoemoe i sona malosi a ua faalagolago lava i le manuia ma meaalofoa mai i le Atua e ola ai. Ai o le mafuaaga lea o le faapea o ana upu i le fuaiupu e sefululua "le Alii e, e te tuuina mai le manuia ia te i matou; aua fo'i ua e faia mo i matou a matou galuega uma(f-12)." O sa'afiafiga ia o le loto, ina ia faamanuia mai pea le Atua i ona manuia e faavavau. O faamanuiaga a le Atua e le gata i fua o galuega ae tauaofia ai fo'i ma meaalofoa ua ia foaiina mai mo le tagata. O le faamanatu a Isaia mo le

fanau a le Atua o lo'o mafatia i le tafeaga, ia aua ne'i mapu le ola fa'alagolago atu i le Atua mo ana faamanuiaga. O manuia o le Atua e faavavau ma e le taofia ona o faiga a le lalolagi. O manuia e leai sona tuaoi, e le faapito i se to'atasi ae tauaofia uma ai tagata e faatuatua ma le faamaoni i le Atua. Ia tatou iloa ma mautinoa, e faamanuia mai pea le Atua ia i tatou pe afai tatou te auauna ia te ia ma le fa'amaoni.

A'O'A'OGA

1. E fa'amanuia mai pea le Atua ia i tatou i taimi uma.
2. Aua le mafaufau ua le alofa le Atua pe a o'o mai mea faigata o le ola.
3. E le avea puapuaga ma ala e punitia ai fa'amanuiaga a le Atua.

MANATU FA'AOPPOPO:

O puapuaga ma faigata o mea moni lava ia e o'o mai i le ola ma tofotofoina at i tatou. Ia matua taumafai malosi e

fa'ailoa i le fanau e le avea ia mea e fai ma auala e fa'avaivaia ai le ola taumafai i totonu o aiga, aemaise lava le

auai mai i le aiga o le Atua. Saili nisi metotia fou o e silafia e fa'afaigofie ai ona avatu lea feau tāua i le fanau.

PESE 333 (Tusi Pese)

Ia tapena le fanau mo le suega mo le Aso Sa o muamua. E lelei fo'i ae fa'aavanoa se aso o le vaiaso e toe fa'amanatu ai mataupu ta'itasi o le masina o Aukuso.

IA MANUIA TELE TAPENAGA O LENEI ASO SA!

SUEGA MUAMUA MO LE MASINA O AUKUSO

Ia tali fesili o lo'o tusia i lalo. E pule lava lau susuga i le faiaoga pe fesili tu'ugutu po'o fesili tusitusi fo'i.

1. O fea sa iai le nu'u o le Atua i le vaitau o Isaia?

Tali: Sa nofo Pologa i le tafeaga i Papelonia

2. Aisea na fa'apologa ai le nu'u o le Atua i Papelonia?

Tali: O le fuafuaga lea a le Atua, se'i a'oa'i ai lona nu'u ina ia aua ne'i toe faia le agasala

3. Fa'amata o tagata uma sa iai i le tafeaga sa leai ni o latou fa'amoemoe?

Tali: E leai, aua o lo'o molimau le mataupu, sa iai lava nai tagata, sa mau pea lo latou fa'atuatua i le Atua.4.

4. O le a le tausaga na tusia ai le tusi o Isaia?

Tali: O le tausaga e 700 T.L.M

5. O le gafa o ai na tupuga mai ai le Mesia e tusa ma le molimau a Isaia?

Tali: Na tupuga mai le gafa o Iese

6. O le a sou iloa, fa'amata o a taimi e tatau ona tatalo ai le tagata i le Atua?

Tali: E tatau ona tatalo le tagata i le Atua i taimi uma ae le na'o taimi e o'o mai ai puapuaga i le ola.

7. Fa'amata o a taimi e fa'amanuia mai ai le Atua i le tagata?

Tali: E fa'amanuia mai le Atua i lana fanau i aso uma o le ola.

8. E fa'apefea ona toe fa'aleleia le lua mafutaga ma le Atua ua malepelepe talu le agasala?

Tali: E fa'aleleia e ala i le salamo moni ma tausisi i le faia o le amiotonu.

9. O le a le matua o lou soifuaga e tataua ai ona e fa'alogo ma usita'i i le Atua ma lona finagalo?
Tali: E leai se tausaga fa'atulagaina. O le taimi lava e te malamalama ma iloa ai le Atua, o le taimi fo'i lea e

te auauna ai ia te ia ma lou loto atoa.

10. O a ni a'oa'oga ua e maua mai i tala o lenei masina?

****Ia tu'u le avanoa i fanau e fa'aali mai ai o latou lagona**

MANATU TA'ITA'I O SETEMA : "AMATAGA O SE LA'ASAGA FOU" (A NEW PHASE BEGINS)

SETEMA 05, 2021

MATAUPU 5: "FA'AMATALAINA O TALA " (STORYTELLING)

TUSI FAITAU GALUEGA 13: 16 - 31

SINI: Ia mae'a lenei mataupu ua iloa ma malamalama le fanau, ia fai i tatou ma mea faigaluega aoga e

fa'amatalalaina le alofa ma le agalelei o le Atua.

FESOASOANI MO FAIAOGA:

Fa'atalofa atu i lenei taeao fou i lau susuga i le faiaoga. O le vaiaso tuana'i sa feagai tatou ma suega, atonu sa fa'amanuiaina le taumafaiga a le fanau i le alofa o le Atua. O le Aso Sa le nei, o lea o le a tatou o'o atu i le tusi o Galuega. A'o le i amataina le mataupu o le nei taeao, e lelei fo'i pe a fesili i le fanau pe iai se isi e mafai ona ia faamatala mai po'o le a le uiga o le upu 'GALUEGA.'Ou te lagona afai e mafai ona faamalamalamaina le uiga o lea upu, atonu o le a faigofie fo'i ona iloa le uiga o le tusi.

FESOASOANI MO LE MATAUPU:

O le tusi o Galuega e manatu nisi o le au popoto o le Feagaiga Fou, o le tusi o lo'o mafuli lava i le faamatalaina o galuega a so'o o Iesu ina ua uma ona tuuina ifo ia i latou le mana o le Atua e ala i le Agaga Paia e tala'i ai le talalelei. E ititi lava se vaega o lo'o ta'ua ai Iesu i mataupu amata ona o le tuuina mai o le galuega i ona so'o. Sa le i gata i so'o o Iesu, ae na faamatalaina ai fo'i ma galuega a le tele o aposetolo faatasi ai ma Paulo le aposetolo lauiloa o le talaleleli. O galuega autu lava sa logologoa ai tala o le au so'o ma aposetolo, o le faia lea o vavega, faamalolo ma'i ma tala'i le talalelei ia Iesu Keriso. O le vaai lena i le tusi i lona aotelega. A o le mataupu lava ia o le nei traeano, o lo'o faatatau lava ia Paulo ma Panapa ma nisi o le au aposetolo. O lo'o famatalaina i le tusi faitau e le tasi se aai sa faia ai le nei galuega, o le faamoemoe ina ia tupu ma ola le tala i le malo o le Atua. Ina ua taunu'u atu i Anetioka i Pisitua, ona avane lea o le mana'o o tagata ia Paulo ma o latou faapea ane "**Sema e, le au uso e, afai ua ia te oulua se upu faamafanafana i le nuu nei ina fai mai ia(f-15).**" O tagata ua galala i le fia fa'alogologo i se feau mai le tala lelei. Fai mai le tala e le i toe faatali Paulo ae na ia tu i luga ma talotalo lona lima ma faapea ana upu amata, "outou Isaraelu e, ma outou o e matata'u i le Atua, faafofoga maia(f-16)." O le feau o lo'o avatu i upu amata, o le talalelei a Iesu Keriso e le gata ia Isaraelu ae tauaofia ai ma le lalolagi uma. Pe a faitau manino i le molimau a galuega, ai lava o lea le faamatalaga a Paulo na manino ai le galuega lavvea'i ma le alofa o le Atua mai lava i le amataga o le lalolagi se ia o'o mai i le taimi o Iesu. Sa faamatala auiliili e le perofeta mea uma ua ia silafia i auga tama ua mavae faatasi ai ma le galuega faaola na saunia e Iesu Keriso.

O le galuega sa faia e Paulo e le taumate sa tele sona aoga i le galuega tala'i sa fegai ma i latou. E ui ua na o se faamatalaina o ni tala, ae na matua talimalie ai le galala o tagata na o ane ia te i laua. E tele ni mea aoga e mafai ona tatou maua mai i lea ituaiga galuega. E le gata o le faaogaina o ni

meaalofa ua ia i tatou, ae ua iloa ai fo'i le Atua e le oge i fa'amanuiaga mo le tagata. E le o le faitatala le faamamafa. Afai fo'i e faitatala, ia faitatala i mea lelei e maua ai le mafutaga vavalalata ma le Atua. O le a'oa'oga lea e fia tulituliloa, ia fai i tatou ma e e tausolomua ona faamatala tala o mea lelei ua faia e le Atua mo le lalolagi aemaise o tatou olaga. Ia faaoga tatau le meaalofa ua tuuina mai e le Atua pe afai o oe o se tagata i fiafia e faamatala tala e faatatau i lona alofa. Ia tautala i mea moni, ae le o mea pepelo. Ia tatou pei o tagata Anetioka e galala i le fia faalogo i se upu faamafanafana mai i auauna a le Atua. Ia tatou pei o Paulo le ola tapena i taimi uma e mo'omia ai e tagata se feau mai i le afioga paia a le Atua. Aua e te manatu faatauva'a i meaalofa ua tu'uina mai e le Atua ia te oe. Ia fesoasoani mai le Agaga o le Atua i le faasoa i le nei taeao. Ia manuia le Aso Sa.

A'O'A'OGA

1. Ia fai tatou ma mea faigaluega e aoga i le Atua ma lona finagalo i so'o se auala e mafai ai.
2. Fa'aaoga tatau meaalofa ua tatou maua mai i le Atua.
3. Ia fa'alagolago pea i le mana o le Atua e maua ai le loto tele e fa'atino ai galueega faigata.

GALUEGA FA'ATINO:

Ia faitau mae'ae'a le tala o lo'o aumaia i le tusi faitau i lenei taeao. E manaia fo'i ae tofia ni tamaiti e latou te fa'ata'ita'iina vaeaga eseese o lo'o taua i le tala; ae maise lava le vaeaga lea na tula'i ai Paulo ma taalo atu lona lima i tagata ma amata loa lana lauga.

UPU MA O LATOU UIGA:

1. Olopalaina- Fa'asala, Fa'apologaina
2. Fa'atoga- Fesili atu, ole atu, manaoga
3. Molitino- momoli, Molia

PESE 185 Tusi Pese

Ia tu'uina atu le tusi faitau mo le Aso Sa o lumana'i e sailiili ai le fanau.
IA MANUIA TELE TAPENAGA O LENEI ASO SA!

MANATU TA'ITA'I O SETEMA : "AMATAGA O SE LA'ASAGA FOU" (A NEW PHASE BEGINS)

SETEMA 12, 2021

MATAUPU 6: "E LE ONA O I MATOU, A IA IA TE OE LE ALI'I E! (NOT BECAUSE OF US, BUT

UN TO YOU LORD!)

TUSI FAITAU - SINI:

GALUEGA 14: 8 - 23

fa'amaoni ma

A mae'a lenei mataupu, ia iloa ma malamalama le fanau, e tāua le onosa'i i suiga o le ola valaauina.

Fesoasoani mo Faiaoga

Fa'atalofa atu i lenei taeao i a outou susuga i Faiaoga. Ou te manatu i lenei taeao ae le'i amataina le mataupu, e lelei fo'i ae fai ni nai fesili e fa'amanatu ai mataupu i le vaiaso ua te'a. O lo'o tatou iai pea lava i le tusi o Galuega e pei fo'i ona tatou iai i le vaiaso ua te'a. E lelei pe a silasila i le mataupu o le vaiaso ua tuana'i ma faaoga mai le tala tomua(historical background) o lo'o iai. E eseese mataupu, ae tutusa lelei lava tala tomua o lo'o faaogaina.

Fesoasoani mo le mataupu

O le vaiaso ua tuana'i sa tatou talanoa ai ia Paulo ma lona faamatalaina o tala i le galuega lavea'i a le Atua mai lava i le amataga se ia o'o mai i le taimi o Iesu Keriso. E pei lava ona fai atu i le vaiaso ua te'a, o le tusi lava ia o Galuega o le faamatalaina o galuega sa faia e so'o o Iesu faatasi ai ma Paulo ma nisi aposetolo. O le manatu taua e fia talanoa iai le mataupu i le nei taeao, *'o le galuega sa feagai ma le au aposetolo sa tumu i faafitauli'*. E le o ni faafitauli laiti, ae o faafitauli lapopo'a ma le ogaoga. O le amataga o le fuaiupu e valu o lo'o ta'ua ai le taunu'u atu o Paulo i Lusa ma fetai'a'i ai ma le tagata o lo'o maua i le ma'i pipili. E tusa ma le molimau a le tusitala faimai, o le nei tagata na pipili lava o ia talu ona fanau mai. Fai mai le tala sa faamalolo e Paulo lea tagata ma ua savali; o lona uiga ua malolo. Na iloa e tagata o Lusa le mea ua faia e Paulo ma ua o latou alalaga i le gagana Lukaonia ma ua faapea ane, "ua afio ifo ia te i tatou atua e pei ni tagata(f-11)." Sa latou faaigoa ia Panapa o Seu, a o Paulo o Hereme ia, aua o ia o le autu o le upu(f-12)." E le gata i lea, a ua latou avane fo'i povi po'a ma pale ma taumafai e osi le taulaga ma ifo atu ia Paulo ma Panapa. Fai mai le tala ua iloa atu e Paulo ma Panapa le mea o le a fai e tagata, ona la saei lea o la ofu ma feosofi atu ma vavao ia i latou ma faapea atu, ***"Alii e, se a le mea ua outou fai ai na mea? o tagata lava i maua nei e tutusa ma outou, ua ma folafola atu le tala lelei ia te outou, ia outou lafoai nei mea le aoga, ma liliu mai i le Atua soifua, o le na faia le lagi, ma le lalolagi, ma le sami, ma mea uma lava o iai(f-15)."*** E foliga mai o le mea sa taumafai tagata e fai o le ifo atu lea ia Paulo ma Panapa ma fai ma o latou Atua. O le vaai a tagata o i laua o ni atua pe a fua i mea ua la faia. Ua latou faavi'ivi'i, o atu faatasi ai ma le taufaasese, taufaase'e ma le taufaavalea.

O le mau ale tusitala fai mai a o taumafai mai nei tagata e faatino ni o latou lagona, na feosofi atu Paulo ma Panapa ma saei o laua ofu ma vavao atu i tagata ina ia aua ne'i taunu'u la latou mea o lo'o tau fai. Ua lava le *'saei o ofu'* e ta'u mai ai ia i tatou lo laua lē taliaina atoatoa o le taufaasese atu a tagata ia i laua. O le fuaiupu e sefululima e o'o atu i le sefuluvalu, o le ata atoa le na o mafaufauga sa ia Paulo ma Panapa. O upu lava a tagata o lo'o galulue moni lava mo le Atua. Ua iloa manino i a la upu ma taaga mea moni o lo'o teu i o la loto. ***O le manatu atoa o lo'o ia Paulo ma Panapa, o le vi'iga ma le fa'ane'etaga e fo'i atu lava i le Atua. Pe faapea fo'i, afai ua uma ona tatou faia se galuega ma ua lelei, o le vi'iga lava e fo'i atu i le Atua.*** Ai ana o se isi o i tatou lea e fa'avi'ivi'i atu e tagata nei, ou te lagona e leai se faafiti a ua atili ai le fa'ane'ene'e. O le fuaiupu e sefuluiva e o'o atu i le luasefulutolu, o lo'o ta'ua ai faafitauli ma mafatiaga na o'o ia Paulo. Fai mai ua o ane tagata Iutaia mai Anetioka ma Ikonio ma latou fetogi ia te ia i ma'a ma toso i tua o le aai ma le manatu ua oti o ia, ae leai. Sa ia toe maua le malosi ma toe faaauau le galuega. Sa ia matua faamalosi atu i loto o le au so'o, ma apoapoai atu ia tumau i le faatuatua; ua ia faapea atu fo'i i nisi o ana upu taua, ***"o puapuaga e tele e tatau ona tatou sao atu ai i le malo o le Atua(f-22)."*** O upu a le toa o le galuega. Sa faai'u le galuega i lea lava ituaso i le faauuina o toeaina e galulue i ekalesia eseese, ona tatalo lea ma anapopogi ma la tuuina atu i latou i le Alii ua latou faatuatua iai. Ua suamalie puapuaga o le galuega ona o le mafaufau ia maua luga pea se vi'iga o le Atua. O le lagona autu lea o le taumafaiga a Paulo ma le au aposetolo, ina ia maua luga ai se vi'iga o le Atua ae le o le tagata. Ia fai se galuega lelei e vi'ia ai le Atua ae le o i tatou. Aua le galue mo viiga, ae galue mo se fesoasoani mo e o lo'o mo'omia ma iloa ai lou faamaoni ma le faia o le amiotonu a le Atua. Ia tatou faapea ifo lava pe a mae'a ona faatino se galuega lelei, ***"E le ona o i tatou, a ia tumau atu i le Atua le viiga."*** Ia fesoasoani mai le Agaga o le Atua i le faasoia i le nei taeao. Ia Manuia le Aso Sa.

A'OA'OGA:

1. Ia e fa'amaoni i galuega ua tofia ai oe
2. Ia e maua le loto mamā
3. Ia iloa tino lou alofa moni i le Atua e ala i ou galuega fai.

GALUEGA FA'ATINO:

O se tala manaia tele le mataupu o lenei taeao, ma e ono tele se fa'atinoga e mafia ona fai ai. Ia tofia

ni tamaiti se to'alua e fa'atino ina le vaega Paulo ma Panapa. Ia tofia fo'i se tasi e avea ma pipili, a'o le to'atele ia fa'aoga e fai ma motu o tagata. E iai le vaega o le tala o lo'o ta'ua ai le saeia e Paulo ma Panapa o la'ua ofu. E manaia ae fa'atino lelei le vaega lea o le tala, auā o inā o lo'o aumaia ai se feau taua mo tatou. Ia fa'aavanoa se sefulu minute mo lea fa'atinoga. E sili ona matagofie pe a fesili i le faifeau pe mafafoi ona fa'atino i luma o le aoga Aso Sa atoa.

UPU MA O LATOU UIGA:

1. Pulato'a- Pupula sa'o mo se taimi mulimuli
2. Augatupulaga- O tupulaga e tele
3. Tu'ufaitalia- Tu'usa'oloto

PESE- 91 Tusi Pese

Ia tu'uina atu le tusi faitau mo le Aso Sa o lumana'i e sailiili ai le fanau.
IA MANUIA TELE TAPENAGA O LENEI ASO SA!

MANATU TA'ITA'I O SETEMA : "AMATAGA O SE LA'ASAGA FOU" (A NEW PHASE BEGINS)

SETEMA 19, 2021

MATAUPU 7: "ESEESE LE AUFALGALUEGA AE TASI LE FEAU" (DIFFERENT CARRIERS,

SAME MESSAGE)

TUSI FAITAU - SINI:

GALUEGA 15: 30 -41

galuega fa'atino ae

Ia mae'a lenei mataupu, ia iloa ma malamalama le fanau, e tāua le na o upu.

FESOASOANI MO FAIAOGA:

A'o le'i amataina le mataupu o lenei taeao, e lelei pe a amata i nai fesili se tolu pe lima e tuliloa ai le mataupu i le vaiaso ua te'a po'o manatua pea e se isi. E tāua tele lea faiga e tapena ai le fanau mo le su'ega tele o le a soso'o. O lea fo'i ua tatou toe iai i le tusi o Galuega. E tāua fo'i le fesili i le fanau po'o a ni mea o latou manatua i le tusi o Galuega i lona aotelega. Ia faamanatu pea i le fanau le mafuaaga ma le faamoemoe na tusia ai lenei tusi. Ia taumafai fo'i e faamanatu pea ni tagata taua e pei o Paulo ma nisi o lo'o ta'ua i le nei tusi ina manatua pea e le fanau. Saili se pese e fetau ma le mataupu, pe faaoga fo'i le pese o lo'o tusia i le pito i lalo o le mataupu. e faamalamalama atili ai le fe'au o le nei taeao. Manuia le faamatalaina o le mataupu.

FESOASOANI MO LE MATAUPU:

O le tusi faitau o le nei taeao, o le mataupu atoa o lo'o faatatau i le "*Finauga i le Peritomeina*". A faitau mae'ae'a iai, e tele so'o po'o aposesitolo o lo'o taua o latou igoa sa iai i lea finauga tele. E le taumate o i latou uma fo'i nei sa tele so latou sao i le galuega ale Ali'i. I le fuaiupu muamua e o'o atu i le luasefulutasi, e iai nisi sa fai a latou lauga ma fautuaga se i tau faafifilemu ai le mataupu ma tupu ai se nofo lelei o tagata ma le au-faigaluega. E sa'o ai upu a le au matutua, "*e leai lava se mea e maua ma le filemu.*" Ia, pe faapea fo'i "*o le tele o popo e sua ai le lolo.*" E le afaina le tele o tonu ma le pisapisao, a o le mea taua ia taunu'u i se taunu'uga lelei. O le fuaiupu e luatolu e o'o atu i le luaiva, o lo'o faamatalaina ai se leleiga i le va o toeaina, aposesitolo, atoa ma ekalesia uma. O le

faaiuga lena o le vevesi atoa ai ma fautuga o lo'o ta'ua i le fuaiupu muamua e o'o i le luatasi. Ua sa'o ai fo'i la le isi fuaitau a le atunu'u e faapea, "e tetele lava i fisaga ae matua i le oo" O lona uiga pe a faamatalaina, "*e ui lava i le vevesi ae i'u a i le manuia.*" O le fuaiupu e tolusefulu e o'o atu i le fasefulutasi, o le vaega lea o le tusi faitau o lo'o taoto ai le mataupu filifilia o le nei taeao. O lea ua mae'a atu faafitauli ma mea sa tutupu i le amataga. A'o lea fo'i ua uma ona toe fai le leleiga i le va o tagata ma le afaigaluega totofi. O lea ua tu'uina atu e o e tala'i le tala lelei e pei ona ta'ua i le fuaiupu e tolusefulu. O Paulo, Panapa, Iuta, Sila ma Ioane le ua igoa ia Mareko. O i latou ia o lo'o ta'ua sa tofia ma o atu e faataunu'u le galuega. Sa mana'o Panapa e latou te o ma Paulo ma Ioane, a ua le loto iai Paulo aua ua ia toe manatua le mea na tia'i ai e Ioane i la'ua i Pafulia ae toe fo'i i Anatioka. Ua le fiafia Panapa i le manatu lea o Paulo ma ua tupu ai le loto tiga. O le ala lea na tonu ai i lona manatu e la te o ma Ioane, a ua o lava Paulo ma Sila. Ua o Panapa ma Ioane i Kuperu, ae o Paulo ma Sila i Suria ma Kilikala. E ui lava o aposetolo o tagata ua filifilia e talaiina le finagalo o le Atua, ae le o ni agelu po'o ni atua. O tagata ola e pei o i tatou, ma e iai fo'i o latou vaivaiga. O le ala lea o le tiga o loto o Paulo ma Panapa ma tupu ai se feeseeseaiga i lo la va e pei ona ta'ua i le tusi faitau. O uiga masani ia o le olaga nei. E iai lava taimi e lelei ai, ae e iai fo'i taimi e vevesi ai. E ui lava ina vevesi ma eseese le au faigaluega, ae o le mea manino e tasi lava le fe'au, o le talaiina lea o le finagalo o le Atua. E le faigofie le galuega; sa folau i le vasa tele ma savalia le tele o malo eseese. Sa feagai ma amioga le taupulea a tagata ma lamatia ai lo latou ola. E ui i nei mea uma, ae sa faaalua lava le silisiliese o le Atua i lo latou soifua na mafua ai ona faataunu'uina le fe'au. E le tu'ulafoaiina e le Atua le tagata finau ma faalagolago atu ia te ia i mea lelei uma. Ia fesoasoani mai le Agaga o le Atua i le faasoia i le nei taeao.

A'OA'OGA

1. Ia lava le onosa'i i mea tiga o le ola.
2. Ia maua le loto fa'amagalo ma le alofa.
3. Ia maua le nonofo fealofani

GALUEGA FA'ATINO

1. O lo'o tatou iai pea i le tusi o Galuega. I lo'u taofi, ia aua le fiu e fa'atino mataupu o lo'o aumai i ia tusi aua o le igoa o le tusi o Galuega. O lona uiga e tataua ona faia pea galuega fa'atino. E manaia fo'i le tala o lenei taeao ae fai ai se fa'atinoga pu'upu'u. O le vaega taua lea o le galuega tala'i a Paulo, o le o atu e tala'i atu le tala lelei. O le mea lea ia tofia ai ni tamaiti se toa'lima e fai ma Aposetolo, e latou te fa'atinoina le tala e pei ona aumaia i le tusi faitau.

IGOA O APOSETOLO E AO ONA MANATUA PEA:

1. Paulo
2. Panapa
3. Iuta
4. Sila
5. Ioane- Le ua igoa fo'i ia Mareko

PESE: 255 Tusi Pese

Ia tapena le fanau mo le suega mo le Aso Sa o muamua. E lelei fo'i ae fa'aavanoa se aso o le vaiaso e

toe fa'amanatu
ai mataupu ta'itasi o le masina o Setema

SETEMA 26, 2021

SUEGA MO LE MASINA O SETEMA

Ia tali fesili o lo'o tusia i lalo. E pule lava lau susuga i le faiaoga pe fesili tu'ugutu po'o fesili tusitusi fo'i.

1. O ai le paaga muamua a Paulo na o la to'alua i le galuega?

Tali: O Panapa

2. O le a le mana'o o tagata Anetioka sa tu'uina atu ia Paulo ma Panapa ina ua la taunu'u ane?

Tali: Sa o latou fa'apea atu ia Paulo ma Panapa, afai o iai ni upu fa'amafanafana ia te oulua ināfai atu ai i le

nu'u.

3. O a ni tala sa fa'amatalaina e Paulo e tusa ma le mataupu "Fa'amatalaina o tala?"

Tali: Sa fa'amatalaina e Paulo tala o le galuega fa'aola a le Atua mai lava i le amataga seia o'o mai i le taimi

o Iesu.

4. O le a se mea e masani ona fai ma fa'alavelave ia i tatou i taimi e fai ai se galuega?

Tali: O fa'afitauli

5. O le a le ma'i na maua ai le tagata na fetaia'i ma Paulo i Lusa e pei ona ta'ua i le mataupu "E le ona oi matou

a ia ia te oe le Alii e,"

Tali: O le tagata pipili

6. O le a le gagana na alalaga ai tagata ia Paulo ina ua uma ona ia fa'amalōlō le tagata pipili?

Tali: O le gagana Lukaonia

7. O le a le uiga o le igoa Hereme na fa'aigoa ai e tagata Paulo?

Tali: O lona uiga o ia o le autū o le upu

8. O ai uma le aufaigaluega eseese o lo'o ta'ua i le mataupu "Eseese le aufaigaluega ae tasi le feau?"

Tali: O Paulo, Panapa, Iuta, Sila, ma Ioane

9. Aisea na le mana'o ai Paulo e ave Ioane i le la malaga ma Panapa?

Tali: Auā na toe manatua e Paulo le mea na tia'i ai i la'ua e Ioane i Pafulia ae toe fo'i i Anetioka.

10. O ai na toe filifilia e Paulo e la te to'alua i le galuega ina ua o Panapa ma Ioane?

Tali: O Sila

**** MASINA ATOA O OKETOPA 2021 ** TAPENAGA MA LE MALOLOGA MO LE LOTU O TAMAITI ***

MANATU TA'ITA'I O NOVEMA : "OU TE TULA'I ATU NEI " (HERE I STAND.)

NOVEMA 07, 2021

MATAUPU 9 : "IA I'U INA IA MANUMALŌ LE ALOFA TUNOA" (THAT GRACE MIGHT REIGN)

TUSI FAITAU:
SINI:
pea le alofa

ROMA 5: 12-21

**A mae'a lenei mataupu, ia iloa ma malamalama le fanau, e manumalo
tunoa o le Atua mo ona tagata fa'atuatua.**

FESOASOANI MO FAIAOGA:

Fa'atalofa atu ia outou susuga i faiaoga i lenei taeao fou. Ou te taofi sa manuia le taumafai o le fanau i le vaiaso ua tuana'i e ala i le faiga suega. O lea o le a tatou amata i mataupu o le masina o Novema i lenei taeao. Ua maea'a atu le tusi o Galuega, a'o lea o le a tatou galulue i le tusi o Roma. A'o le'i amataina le mataupu, e lelei ona fesili pea i le fanau pe iai se isi na te manatua le mataupu i tua atu o le suega sa feagai ai. A mae'a lea, ia taumafai loa e fa'amatala auiliili le mataupu o lenei taeao. Ia saili se pese talafeagai mo le mataupu.

FESOASOANI MO LE MATAUPU:

O le tusi o Roma o le tusi na tusia lava e Paulo e tusa ma le molimau a le au popoto o le feagaiga fou. O lenei tusi na tusia mai a'o iai i Korinito i le tausaga e 57 A.D., a'o sauni atu Paulo mo lana malaga i Ierusalem. O lenei tusi na tusia lava mo tagata kerisiano o lo'o nonofo i Roma. Ua ta'ua nei mea uma ona e tataua ona silafia e le fanau ma fa'alauteleina ai lo latou malamalama i le tusi o Roma. O le faitau o le au popoto o le feagaiga fou, o le tusi a Paulo i Roma o le tusi sa matuā lelei ona tapena e fa'amatalatala ai le loloto ma le maualuga o lo'o iai lona fa'atuatua i le galuega a le Atua. A faitau mae'ae'a i lenei tusi, e matuā faigata lava ma loloto mataupu uma o lo'o iai. O le isi fo'i fa'amoemoe o lenei tusi, o le fa'ailoa atu lea e Paulo lona tagata fa'atasi ai ma lona fa'afeiloa'i atu i le malologa. I le mataupu o lenei taeao, o lo'o taoto ai se fa'afinauga. O lenei vaega o le tusi (f:12-21) o lo'o fa'aigoaina e nisi "**O le oti ia Atamu ma le ola ia Keriso**". E le toe tau fa'amatalaina Atamu ma lona taua i totonu o le Tusi Paia. O ia o le ulua'i tagata sa vaaia ma tausia le foafoaga atoa i le amataga. O le tala a Kenese, e ui lava o le ulua'i tagata, ae sa sēsē fo'i o ia ma agasala. E ui lava fo'i ina tu'uaina e nisi le mafuaaga o le agasala ia Eva, ae o le agasala lava o le agasala. E mafai ona tatou fa'apea, o le agasala a Atamu e pei e foliga mai ua ta'usalaina uma ai ma e na mulimuli mai seia o'o i le taimi o Mose. I le taimi o Mose, sa fai tulafono e ta'itaina ai le ola o tagata o le Atua. O tulafono e iai le talitonuga o se isi lea fuafuaga loloto a le Atua na fai ma ta'iala e fa'atonutonu ai, le ola leaga o tagata ma le faia o le agasala; O le tulafono ua fa'avasega mai ai le eseese o mea e tataua ona faia, ma mea fo'i e le tataua ona faia e le tagata.

O le taimi la o Atamu, Mose, fa'atasi ai ma le tulafono, sa le'i mafai ai ona totogia pe magalo ai agasala a tagata.

O lo'o manino fo'i le talitonuga fa'afeagaiga tuai o le tau'i lava o le agasala o le oti. O lona uiga, o le agasala lava e le fa'amagaloina. Sa fa'apea fo'i le feagaiga tuai atoa, ma o le ala lea na valoia ai e Perofeta le o'o mai o se Mesia ma le

fa'aolataga. O le finauga a Paulo, o le maliu ma le toetu o Iesu Kersio ua suia ai mea uma. Ua le toe tu'u aunoa ina le

tagata e nofo fa'anoanoa i le leai o se fa'amagaloga pe afai ua ta'usalaina. Ua le toe manumalo le oti ona o le agasala

e pei ona iai i taimi o Atamu. Ua afio mai Keriso, o le tino mai lea o le alofa tunoa o le Atua ma ua magalo ai le

tagata. E ui ina sala le tagata ona o Atamu, a ua ta'uamiotonuina le foafoaga ona o le amiotonu o Iesu Keriso. O le

mea sili ona tāua e le'i alu loa nei fa'aletonu ina ia fa'avavau, a ua maua le fiafia ona o le alofa tunoa o le Atua e ala

i le amiotonu na atagia i lona alo pele o Iesu Keriso. E ui lava ina tautua pea le agasala ma le

amiotonu i aso uma o
 le ola, a ua tatou fiafia nei auā ua i'u lava ina manumalō le alofa tunoa o le Atua. Ua tatou manuia, auā ua lē toe avea
 i tatou ma pologa o le agassala e fa'avavau. Ua tatou iloa nei e mafai ona fa'amagaloina a tatou agasala e ala i le toto
 ma le tino o Iesu Keriso pe afai tatou te fa'atuatua ia te ia i le agaga ma le fa'amaoni lava. O le mea e tasi ia o tatou
 manatua, e le fa'apea e avea lea fa'amanuiaga e fai ma auala e tatou te faia ai pea le agasala ma fa'amoemoe e
 fa'amagaloina i tatou e le Atua i taimi uma e sēsē ai. O lo tatou fa'amagaloina ma le lē fa'amagaloina, o le pule
 faitalia lenā a le Atua. O le tatou matāfaioi, o le auauna i le Atua ma le fa'amaoni ma le agaga fa'afetai auā ua i'u lava ina manumalo lona alofa tunoa.

A'OA'OGA

1. Ia talitonu ma le loto atoa i le alofa tunoa o Iesu Keriso.
2. Ia aua ne'i avea le alofa tunoa o le Atua e fai ma auala e faia ai pea le agasala.
3. Ia e fa'amaoni i lo oulua va feagai ma le Atua.

UPU MA O LATOU UIGA:

1. Ta'usalaina- E ta'ua ua agasala
2. Foa'ifuaina- Foa'i fua e leai se totogi
3. Ta'uamiotonuina- Amiotonu

PESE: 260 Tusi Pese

Ia tu'uina atu le tusi faitau mo le Aso Sa o lumana'i e sailiili ai le fanau.
 IA MANUIA TELE TAPENAGA O LENEI ASO SA!

MANATU TA'ITA'I O NOVEMA : "OU TE TULA'I ATU NEI " (HERE I STAND.)

NOVEMA 14, 2021

MATAUPU 10: "FA'ATULAGAGA O LE LALOLAGI FOU" (THE NEW WORLD ORDER)

TUSI FAITAU: ROMA 6: 15-23

SINI: A mae'a lenei mataupu, ia iloa ma malamalama le fanau, e fesoasoani le Atua i ni

suiga lelei o le olaga.

FESOASOANI MO FAIAOGA:

Fa'atalofa atu i lenei taeao fou i le alofa ma le agalelei o le Atua. O le vaiaso ua tuana'i sa tatou amata ai i le tusi lava lenei o Roma. E lelei fo'i ae toe silasila iai i lana tala tomua atonu e fa'afaigofie ai ona malamalama le mataupu o lenei aso. I lenei taeao, e fa'aogaina pea le tusi o Roma e ui lava e eseese mataupu. E lelei pe a taumafai pea e fai ni nai fesili e te iloa ai pe na malamalama le fanau i le mataupu i le vaiaso ua mavae. A mae'a lea, ona fesili lea i le fanau pe malamalama i le uiga o le upu fa'atulagaga aua afai e malamalama ai le fanau, ona faigofie lea o le gasologa ma le fa'amatalaina o le mataupu. Ia saili se pese e talafeagai ma le mataupu o lenei taeao.

FESOASOANI MO LE MATAUPU:

E tele ni mafaufauga e oso a'e pe a vaai atu i le fa'auupuina o le ulutala. O lea ua uma ona tatou a'oa'oina le tala o le foafoaga o lo'o tusia i le Kenese e fa'amalamalama ai le fausiaina e le Atua le lalolagi o lo'o tatou nonofo ai nei. O le fesili, o le ā lea lalolagi fou o lo'o aumaia e le mataupu i le nei taeao? E lua ni vaeaga e fia vaevaeina ai manatu o le mataupu. Muamua, o le avea ma pologa o le agasala. Lua, sa'oloto ona o le amiotonu. E tali foliga tutusa lava ma le finauga o le mataupu i le vaiaso ua tuana'i se i vagana ai nai eseese laiti. O lo'o amata lava le parakarafa i le fesili e fa'a'apea, "o lenei, pe fa'a'apefea? Tatou te agasala ea ina ua tatou le nonofo i le tulafono, a o le alofa tunoa? Aua nei fa'a'apea (f-15)." A toe fa'auupu lenei fesili ona fa'a'apea lea, po ua tataua ea ona tatou faia pea le agasala auā ua tatou nonofo i lalo o le alofa tunoa ae lea o le tulafono? A toe silasila i le fesili, o lo'o aumai ai se naunautaga e ta'u atu i tagata ina ia aua ne i avea le alofa mai o le Atua e sa'oloto ai le faia o le agasala. E le o le uiga ia saloto pea le faia o le agasala aua o lo'o iai Iesu e na te faamagaloina.

O le vaeaga muamua lea o le mataupu, o le nofo pologa i le agasala. O le finauga tele lea a Paulo. Sa ia taumafai malosi i ana tusitusiga e fa'amatala auiliili le ola pologa sa iai tagata ona o le agasala. I le manatu o le aposetolo, o le avea ma pologa o le agasala o se lalolagi tuai lea sa ola ai le tagata a o le i afio mai Keriso. E mafai fo'i ona tatou fa'apea, o se lalolagi sa soona nunumi ma leaga sona faatulagaga talu ai amioga a tagata. E le o talanoa le mataupu i le itu i le tino aua ua uma ona toe fa'amafolafola e le Atua le soona nunumi sa iai e tusa ma le tala a Kenese i le foafoaga. O lea o lo'o talanoa le aposetolo i le ola faleagaga. Manatua fo'i le tatou mataupu i le vaiaso ua tuana'i. O taimi o Atamu ma Mose o le feagai ai lea ma le agasala e le fa'amagaloina. O le lalolagi tuai le na i le ola fa'aleagaga o tagata o le nu'u o le Atua. O le lalolagi sa le toe mafai ona fetu'una'i aua o le agasala lava ma si ona tau. Sa faalagolago mea uma i le lelei ma le leaga o le taumafaiga a le tagata. O le vaitau sa tu'u atu sa'o lava e le Atua le tau o mea uma e fua i le faatinoga a le tagata. O le vaeaga lua o le mataupu o lo'o talanoa i le amiotonu e maua ai le saolotoga o le tagata fa'atuatua. O le lalolagi fou lea ua fa'atulagaina e le Atua mo i tatou. O se lalolagi e tatou te ola ai i se olaga mamā. O le ala lea o le auina mai o lona Alo pele o Iesu Keriso ina ia le fano se tasi e faatuatua ia te ia a ia maua le ola e faavavau. E agasala fo'i le tagata Kerisiano, a o le mea taua o lea ua uma ona faataoto se alafua lelei mo ia e ola ai. O lea alafua, ia iloa e le tagata ona salamo ma toe fo'i i le Atua pe a fai ua sese. O le faatulagaina lea o lo tatou lalolagi fou, ia maua le loto maulalo e iloa ai ona salamo ma famamaina. O le lalolagi fou, e ola le tagata ma le mautinoa ua uma ona tapena e le Atua le fa'aolataga e aveesea ai le ola pologa mai i le agasala. Ia fesoasoani mai le Agaga o le Atua i le faasoia i le nei taeao. Ia manuia le Sapati.

A'OA'OGA

1. Ia faafouina le lua mafutaga ma le Atua e ala i le salamo faamaoni o le loto
2. Faaaoga tataua avanoa ua e maua.
3. Ia manatua ua tatou maua le sa'olotoga ona o le maliu o Iesu Keriso.

PESE: 80 Tusi Pese

Ia tu'uina atu le tusi faitau mo le Aso Sa o lumana'i e sailiili ai le fanau.

IA MANUIA TELE TAPENAGA O LENEI ASO SA!

'MANATU TA'ITA'I O NOVEMA : "OU TE TULA'I ATU NEI " (HERE I STAND.)

NOVEMA 21, 2021

**MATAUPU 11 :
CHRISTIANS**

**“O MEA E AO ONA FAIA E LE TAGATA KERISIANO” (WHAT
SHOULD DO)**

TUSI FAITAU:

KOLOSE 3: 1-25

**SINI:
tatou**

A mae'a lenei mataupu, ia iloa ma malamalama le fanau, e tatau ona mulimuli i ala o le Ali'i.

FESOASOANI MO FAIAOGA:

Ua tatou tu lalata i le fa'aiuga o lenei tausaga aoga. Ua toe tasi le Aso Sa ona tatou malōlō fo'i lea. O le mea lea ua ou manatu ai e fa'aoga le tusi lea mo tatou i le nei taeao. O se fautuaga a'o se fa'amanatu fo'i mo i tatou i mea e ao ona tatou savavali ai i aso uma o le ola.

FESOASOANI MO LE MATAUPU:

O le molimau a le au popoto o le Feagaiga Fou o le nei tusi na tusia lava e Paulo i le tausaga 60 A.D. a'o iai o ia i le falepuipui i Roma. O le nei tusi na ave aga'i i le Ekalesia i Kolose fa'apea Asia itiiti. O le fatu o le tusi o le tau fa'asoina o nisi o fa'aletonu o le galuega ma le feau e fia avatu i tagata fa'atuatua uma e latou te maua mea uma e mana'omia i le Ali'i o Iesu Keriso. O le fa'afitauli lea e tupu, ua tele talitonuga eseese ma tagata fa'afitauli ua lolofi atu ma a'oaoga eseese ina ia tosina iai mafaufau o le au Kerisiano. E pei o se fa'afitauli tumau lea e feagai pea ma Paulo i so'o se aai e malaga iai ma faatino ai le galuega tala'i. Masalo ai ona o le maua o le poto faatasi ma tagata loto leaga ia Paulo e mafua ai nei faiga. O le ala lea o le le malolo o le aposetolo i lana taugologolo i taimi uma i le au kerisiano. O le faamoemoe atoa o le taugologolo, ina ia aua ne i liliu ese tagata mai i le mea moni e laveaiina ai. O le mataupu lea e tolu, o se fa'amalosi atu lea a Paulo i le au Kerisiano ina ia tumau i le Ali'i e manuia ai. I le fuaiupu muamua e o'o i le fā, o lo'o matuā fa'amamafa mai ai e Paulo le tāua o le ola e tu'u atoa i le Atua. O le manatu o le aposetolo, ia aua lava ne'i iai se avanoa e tu'uina atu e le tagata o le Atua i le lalolagi ma ana faiga. O le fa'amanatu a le aposetolo, o lea lava ua tu'ua e Keriso lona mamalu ma le silisiliese ae afiō mai e ola faatsi ma tagata ina ia faaolaina ai le lalolagi. O le tali a le tagata i le fa'aolataga, o le faia lea o le finagalo o le Atua. O le fa'atinoina o le ola fa'a Kerisiano e tatau mo le tagata, o lea o lo'o ta'ua i fuaiupu mulimuli ane.

O le fuaiupu e lima e o'o atu i le sefulutasi, o lo'o talanoa mai nei fuaiupu i le ulua'i gaoiga e tatau ona faia e le tagata Kerisiano. O le ā lea gaoiga? ***"O lenei ia outou fasioti o outou itu tino o i le lalolagi (f-5)"***. O itu tino o le lalolagi e aofia ai mea o lo'o ta'ua e pei o le "faitaaga, amio leaga, fa'amataaitu, tu'inaanu leaga ma le mata pe'ape'a.(f-5)." O le mau a le aposetolo, e tutusa lava ia mea ma le ifo i tupua. E o'o lava i lagona o le tagata e pei o le ita, loto leaga, upu leaga, ma isi uiga leaga uma faapea fai mai Paulo e tatau ona fasiotia. O lona uiga o le tagata e tatau ona fa'afouina ma fa'apaiaina lona ola e le Ali'i. O le faia pea o le agasala e o'o mai ai le to'asa o le Ali'i e pei ona ta'ua i le fuaiupu e ono. O le fuaiupu e sefululua e o'o atu i le sefulufitu, o lo'o famatala mai ai uiga e tatau ona faia e le tagata e mafai ai ona ia fasiotia lona tagata tuai.. La a le aposetolo, ia oofu i le alofa mutimutivale, o le agalelei, loto mauilalo, agamalū ma le onosa'i fa'apei o ē ua filifilia e le Atua. E tele fo'i isi amioga ma uiga lelei o lo'o aumaia e lea lava parakarafa e fa'atino ai le ola fou ua iā Keriso Iesu. O le tamāoaiga tele lea ua maua mai i le soifuaga ma a'oaoga a le Ali'i o Iesu, lea ua fai mai Paulo ia fa'ata'ita'i iai lo tatou ola ona manuia lea.

O le vaega mulimuli o le tusi (f:18-25), o lo'o tautala fa'apitoa ai Paulo i tagata ta'ito'atasi ma mea e tatau ona latou faia. Ua le fa'apito lava le fa'aseā a le aposetolo i se tagata, a ua tatala mai lona loto ina ia tofū fa'alumaga tagata uma. O fafine, tane, avā e o'o lava i fanau ua aofia uma i lea feau tāua. O pologa fo'i ma o latou matai ua maua fo'i ni fautuaga lelei mo latou. I le mafutaga la lea i le aiga fa'apea fo'i le matai ma lana auauna, o lo'o fa'amamafa mai e le aposetolo le faia o le amiotonu. O le ki lea e tausia ai le va fetalitonua'i i totonu o aiga ma nu'u. A leai se amiotonu, e le mafai fo'i ona maua se filemū ma se nofo lelei. O le faia o le amiotonu e ola fiafia ma sa'oloto ai le tagata. O le tusi atoa le na. O le autū lava; o le toe fa'amanatu mai lea ia i tatou amioga ma le olaga e tatau ona ola ai le tagata Kerisiano. O le mea tāua lava o le fa'atinoga. E leai lava se aogā e faitau ai le Tusi Paia ma tauloto i o tatou mafaufau ia mea, ae le mafai ona ola ai. Faitau nei loa ma ola ai. Ia fesoasoani mai le Agaga o le Atua i le faasoia i le nei taeao.

A'O'A'OGA

1. Ia aveese le olaga leaga ae ola i se olaga fou e fiafia iai le Atua.
2. Ia faamaoni i le lua mafutaga ma le Atua.
3. Ia ola i a'oa'oga mai i le Afioga Paia a le Atua ae le na o upu ma tala.

GALUEGA FA'ATINO

O lo'o ta'ua i le mataupu mea leaga e lē tatau ona faia e le tagata kerisiano fa'atasi ai ma mea lelei e tatau ona ta'itaina ai le ola i aso uma. Silasila i le fuaiupu e lima ma le fuaiupu e ono fa'atasi ai ma le fuaiupu e sefulu lua e o'o atu i le sefulufitu. O le fesoasoani ia taumafai e fai ia fuaiupu ma mea tauloto a le fanau mo lenei masina.

UPU MA O LATOU UIGA:

1. Fefa'apalepalea'i- Tausia le va leleli
2. Fa'aonoono- Fa'atiga le loto, Fa'aita
3. Fa'apalapala- Le manatu mamafa i se mea e fai, Paie

PESE: 175 Tusi Pese

Ia tapena le fanau mo le suega mo le Aso Sa o muamua. E lelei fo'i ae fa'aavanoa se aso o le vaiaso e toe fa'amanatu ai mataupu ta'itasi o le masina o Novema

IA MANUIA TELE TAPENAGA O LENEI ASO SA!

MATAUPU 12 NOVEMA 28, 2021

****SUEGA MO LE MASINA O NOVEMA****

Ia tali fesili o lo'o tusia i lalo. E pule lava lau susuga i le faiaoga pe fesili tu'ugutu po'o fesili tusitusi fo'i.

1. O fea na tusia ai e Paulo le tusi o Roma a'o le a fo'i le tausaga?

Tali: Sa tusia i Korinito i le tausaga 57 A.D

2. O ai na tusi aga'i iai le tusi o Roma?

Tali: O lo'o tusia lava mo le au Kerisiano o lo'o nonofo i Roma fa'atasi ai ma le fa'afeiloa'i atu (greeting) o Paulo i le malō o Roma?

3. O le a le ituaiga tagata e iai Paulo o lo'o atagia i ana tusitusiga i le tusi o Roma?

Tali: O le tagata atamai ma loloto lona silafia o le Atua fa'atasi ai ma le fa'aalia o le tu'uina atu o lona loto

atoa i le galuega a le Atua.

4. O le a le eseesega o le taimi o Atamu ma Iesu o lo'o aumaia i le mataupu "**Ia i'u ina manumalo le alofa tunoa**"

Tali: O le taimi o Atamu, sa fai le tagata ma pologa o le agasala auā sa tausaili se Mesia e na te aumaia le

fa'aolataga. I le taimi o Iesu, ua ea le pologa auā o lona tino ma lona toto ua magalo ai agasala a le tagata.

5. O a vaega e lua o lo'o vaevaeina ai le mataupu "**Fa'atulagaga o le lalolagi fou**"

Tali: Muamua, avea ma pologa o le agasala. **Lua**, sa'oloto ona o le amiotonu.

6. O le a le uiga o le avea ma pologa o le agasala o lo'o ta'ua i le mataupu "**Fa'atulagaga o le lalolagi fou?**"

Tali: O lona uiga o le tumau lea o le tagata i le agasala e le fa'amagaloina. E mafai fo'i ona tatou fa'apea o le

lalolagi tuai lena sa ola ai le tagata.

7. O fea na tusia ai e Paulo lana tusi lea o Kolose?

Tali: Na tusia a'o iai o ia i le falepuipui i Roma.

8. O le a se mea tāua o lo'o ta'ua ile fuaiupu e 5 e tatau ona faia e le tagata ua alofa fa'amaoni i le Atua (**ulutala..o mea e ao ona faia e tagata kerisiano**)

Tali:E tatau i le tagata ona matuā fasiotia lona tagata tuai (Kolose 3:5)

9. O le a le tatalo a Hana i le Atua?

Tali: Sa tatalo Hana i le Atua e fia maua sana tama, ma o le ala lea na foaiina ai e le Atua se tama mo ia.

10. Aisea na fa'atauemu ai tagata ia Hana ma tupu ai lona loto tigā?

Tali: Na mafua ona fa'atauemu tagata ia Hana ona o le fafine e leai sana tama auā e le fanau.

MANATU TA'ITA'I O TESEMA : "FEAGAIGA MA FOLAFOLAGA " (COVENANTS AND PROMISES.)

TESEMA 05, 2021

MATAUPU 13: "O LE TATALO A HANA." (HANNAH'S PRAYER)

TUSI FAITAU: I SAMUELU 2:1-10

SINI: A mae'a lenei mataupu, ia iloa ma malamalama le fanau, e le vaioa meaalofa a le Atua i puapuaga o le ola.

FESOASOANI MO FAIAOGA:

Fa'atalofa atu i lau susuga i le faiaoga i lenei taeao fou. O le Aso Sa mulimuli lenei o lenei tausaga aoga. E avatu ai le fa'afetai ma le fa'amālō i le onosa'i i lenei kuata aoga. O lea ua tatou faai'u i se mataupu masani, ae le uma lava le amaoaiga i a'oa'oga taua tatou te maua mai ai. O le tala masani, o le mea e tatau ai ona fesili pea i le fanau pe iai se isi e mafai ona ia toe faamatala mai le nei tala i ana lava upu. Saili se pese malie ma talafeagai ma le mataupu e faai'u ai lenei tausaga. Ia saunia e lau susuga se tatalo e faai'u ai le mataupu.

FESOASOANI MO LE MATAUPU:

O lenei taeao, o lea o le a tatou fa'ai'u i le tala masani ua fa'aupuina "O le tatalo a Hana." O le tala masani i le tou faitau ma le tatou fa'alogologo, peita'i, e tele lava ni a'oa'oga e mafai ona tatou maua mai i lea tala masani. Manatua fo'i o Hana o le tinā sa tagi i le Atua e fia maua sana tama. O le mea lea na foaiina mai ai e le Atua le tama ia te ia ma fa'aigoa ia Samuelu. E ui ina faigatā le mana'o o Hana, ae sa tali mai lava le Atua ia te ia. O le tatalo a Hana, o le tatalo e fa'afo'i ai lana fa'afetai i le Atua ona ua tali mai i ana talosaga. E le gata i lea, o le tatalo e fa'ane'ene'e ma fa'aailoa ai le tū maualuga o le pule alofa a le Atua ia te ia. O le tatalo e ta'u mai ai ia i tatou o le Atua o le papa e tumau e le suia e se tagata. Manatua fo'i o Hana o se tinā sa matuā tigā lona loto ona o le ulagia o ia e tagata i le leai o sana tama. O le isi lea fa'amanatu tāua o lo'o aumaia i le nei tala. O le tataloo fa'afetai a Hana i le Atua, ona e ui i uiga leaga o tagata ae na te le o tu'ulafoaiina o ia.

O le fuaiupu e fa e o'o atu i le iva, o lo'o ta'ua ai i le tatalo a Hana le malosi lea o le Atua e na te

suia ai mea leaga i mea lelei. O le malosi e na te faia ai suiga lelei sa le i mafauina e le tagata. O nei fo'i suiga e matuā faigofie lava ona fai, aua o lo'o ia te ia le pule sa'oloto e fai ai. O le malosi ma le pule a le Atua e le gata i le ola, ae aofia ai ma le oti ma tua atu o le oti. O le fuaiupu e sefulu, o lo'o ta'ua ai i le tatalo le leai o se avanoa o le tagata amio leaga i luma o le silafaga a le Atua. O le tatalo lea a Hana i le Atua. O Hana o le tinā fa'atuatua ma onosa'i. E ui lava i le tigā o lona loto, ae na ia talitonu atoatoa e faia e le Atua le mea lelei mo ia. O le tinā finau mo se mea lelei mo ia fa'apea le silafaga a le Atua. Sa ia talitonu lava o le Atua e taunu'u ai mea lelei uma e manatu ai le tagata fa'atuatua. E le i avea uiga leaga ma taufai'ai o tagata e fai ma auala e faavaivai ai Hana, ae na fai ma lu'i ia te ia ma atili ai lona mafuta i le Atua. O se a'oa'oga tele lea mo i tatou. Ia tatou tu'u i le Atua mea uma tatou te mafatia ai. Ia talitonu ma le loto atoa i le Atua i mea uma tatou te ole atu ai. Aua le avea mea vaivai ma uiga leaga o tagata e fa'avaivai ai le ola taumafai mo mea sili. Aua le ola aamu pe tauemu i tagata, aua e le fiafia le Atua i uiga faapena. Ia manatua, o la tatou matafaioi o le faatinoina lea o le finagalo o le Atua ona tatou maua lea o le manuia. Ua tatou iai i le vatau o le Kerisimasi. E mafai ona tatou faapea o le tama sa foaiina ia Hana, e le gata o se faamanuiaga a o se meaalofo lea mai i le Atua i lona onasa'i ma le talitonu ia te ia. Ia fesoasoani mai le Agaga o le Atua i le faasoia i lenei taeao.

A'OA'OGA:

1. Ia loto tele e feagai ma fa'afitauli o le ola.
2. E le fiafia le Atua i le tagata ola aamu.
3. Aua e te fa'avaivai ona o amioga a tagata fa'atauemu.

GALUEGA FA'ATINO

O le tala manaia le tala lea, aemaise lava le vaega na aamu ai tagata ia Hana. O le isi fo'i vaega manaia o le taimi na tatalo ai Hana i le Atua ma le tigā o lona loto ona o tagata fa'atauemu. O le mea lea e manaia fo'i ae tofia ni tamaiti e latou te fa'atinoina le tala lea i lenei taeao. O le tāua o lenei fa'atinoga, ina ia lagona e le fanau le leaga o le ola aamu. aemaise ai le tāua o le ola talitonu i le Atua e māmā ai mea faigata o le ola.

UPU MA O LATOU UIGA:

1. Fuatia- Fa'avasega, Fuafua
2. Fa'atafuna- Fa'aleaga, Talepe
3. Gauia- Gagau
4. Fa'atamaoigaina- Fa'amanuia, Tele le oa,

PESE: 122 Tusi Pese

Ia tapena le fanau mo le suega mo le Aso Sa o muamua. E lelei fo'i ae fa'aavanoa se aso o le vaiaso e toe fa'amanatu ai mataupu uma o lenei kuata aoga mo lenei tausaga.

IA MANUIA TELE TAPENAGA O LENEI ASO SA!

MATAUPU 14

TESEMA 12, 2021

SUEGA FA'AI'U O LE TAUSAGA!

1.O fea sa iai le nu'u o le Atua i le vaitau o Isaia?

Tali: Sa nofo Pologa i le tafeaga i Papelonia

2.Aisea na fa'apologa ai le nu'u o le Atua i Papelonia?

Tali: O le fuafuaga lea a le Atua, se'i a'oa'i ai lona nu'u ina ia aua ne'i toe faia le agasala

3.Fa'amata o tagata uma sa iai i le tafeaga sa leai ni o latou fa'amoemoe?

Tali: E leai, aua o lo'o molimau le mataupu, sa iai lava nai tagata, sa mau pea lo latou fa'atuatua i le Atua.

4.O le a le tausaga na tusia ai le tusi o Isaia?

Tali: O le tausaga e 700 T.L.M

5.O le gafa o ai na tupuga mai ai le Mesia e tusa ma le molimau a Isaia?

Tali: Na tupuga mai le gafa o Iese

6.O le a sou iloa, fa'amata o a taimi e tatau ona tatalo ai le tagata i le Atua?

Tali: E tatau ona tatalo le tagata i le Atua i taimi uma ae le na'o taimi e o'o mai ai puapuaga i le ola.

7.O ai le paaga muamua a Paulo na o la to'alua i le galuega?

Tali: O Panapa

8.O le a le mana'o o tagata Anetioka sa tu'uina atu ia Paulo ma Panapa ina ua la taunu'u ane?

Tali: Sa o latou fa'apea atu ia Paulo ma Panapa, afai o iai ni upu fa'amafanafana ia te oulua ināfai atu ai i le nu'u.

9.O a ni tala sa fa'amatalaina e Paulo e tusa ma le mataupu" **Fa'amatalaina o tala?"**

Tali: Sa fa'amatalaina e Paulo tala o le galuega fa'aola a le Atua mai lava i le amataga seia o'o mai i le taimi o Iesu.

10.O le a se mea e masani ona fai ma fa'alavelave ia i tatou i taimi e fai ai se galuega?

Tali: O fa'afitauli

11.O le a le ma'i na maua ai le tagata na fetaia'i ma Paulo i Lusa e pei ona ta'ua i le mataupu" **E le ona oi matou a ia ia te oe le Alii e,"**

Tali: O le tagata pipili

12.O le a le gagana na alalaga ai tagata ia Paulo ina ua uma ona ia fa'amalōlō le tagata pipili?

Tali: O le gagana Lukaonia

13.O fea na tusia ai e Paulo le tusi o Roma a'o le a fo'i le tausaga?

Tali: Sa tusia i Korinito i le tausaga 57 A.D

14.O ai na tusi aga'i iai le tusi o Roma?

Tali: O lo'o tusia lava mo le au Kerisiano o lo'o nonofo i Roma fa'atasi ai ma le fa'afeiloa'i atu (greeting)o Paulo i le malō o Roma?

15.O le a le ituaiga tagata e iai Paulo o lo'o atagia i ana tusitusiga i le tusi o Roma?

Tali: O le tagata atamai ma loloto lona silafia o le Atua fa'atasi ai ma le fa'aalia o le tu'uina atu o lona loto

atoa i le galuega a le Atua.

16.O le a le eseeseega o le taimi o Atamu ma Iesu o lo'o aumaia i le mataupu "**Ia i'u ina manumalo le alofa tunoa?"**

Tali: O le taimi o Atamu, sa fai le tagata ma pologa o le agasala auā sa tausaili se Mesia e na te aumaia le

fa'aolataga. I le taimi o Iesu, ua ea le pologa auā o lona tino ma lona toto ua magalo ai agasala a le

tagata.

17.O a vaega e lua o lo'o vaevaeina ai le mataupu "**Fa'atulagaga o le lalolagi fou**"

Tali: Muamua, avea ma pologa o le agasala. **Lua**, sa'oloto ona o le amiotonu.

18.O le a le uiga o le avea ma pologa o le agasala o lo'o ta'ua i le mataupu "**Fa'atulagaga o le lalolagi fou?"**

Tali: O lona uiga o le tumau lea o le tagata i le agasala e le fa'amagaloina. E mafai fo'i ona tatou fa'apea o le

lalolagi tuai lena sa ola ai le tagata.

19. O a ni a'oa'oga ua e maua mai i mataupu sa a'oa'oina i lenei tausaga?

Tali: Tu'u le avanoa i le fanau e fa'asoa mai ai o latou lagona

20. O le a sou lagona, aisea e taua ai lou sau i le aoga Aso Sa?

Tali: Tu'u le avanoa i le fanau e fa'asoa mai ai o latou lagona

MANUIA LE TU'UAGA - TOE FEILOA'I I LE 2022!!!



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org

